

Date – 15/03/2025

Time - 7:30 -7:40Hrs

REGIONAL NEWS BULLETIN

HEADLINES (MORNING)

1. Union Home Minister Amit Shah chuan Zokhawsanga Assam Rifles insawn tur thlahna hun hmang turin vawiin hian Aizawl a lo kal ang.
2. Chief minister Pu Lalduhoman Aizawl khawpui laili a Assam Rifles ram luah chhuahsan a nih hnu-ah Assembly House din sorkarin tha a ti, tih a sawi.
3. Indian Space Research Organisation (ISRO) chuan satellite an kahchhuah atangin dollar maktaduai 143 an thawkchhuak
4. China, Russia leh Iran te chuan US in Iran a hrekna titawp a, nuclear lama thawhdunna tharthawh leh turin an ngen.

<><><>

HM VISIT

Union Home Minister Amit Shah chuan Zokhawsanga Assam Rifles insawn tur thlahna hun hmang turin vawiin hian Aizawl a lo kal dawn a,

Thlahna hun h manna tur, 23 Sector Assam Rifles, Khatla a panna tur kawngpui dung Bawngkawn-Chaltlang-Chanmari-RamhlunRoad-Chanmari, Zarkawt, Dawrpui, Treasury Square, Tennis Court, Khatla leh Lengpui Airport a panna tur kawngpui dung Khatla atanga Vaivakawn/Company peng atanga Lengpui Airport- Sakawrtuichhun Road inkarah chhun dar 12 atanga tlai dar 4 thlengin chawhmeh emaw thil dang zuara in pho a theih dawn loh tih Aizawl DC chuan thupek a chhuah a. Parking Area nilo kawngpui dungah eng lirthei chi mah hun phal a ni lo bawk a ni.

Assam Rifles Zokhawsang-a insawn tur chungchang hi nikum October ni 23 khan Mizoram sawrkar leh Assam Rifles aiawh ten New Delhi Mizoram House ah inremna an ziaak tawh a, he inremna ah hian Assam Rifles te chuan Lammual leh a chhehvela Assam Rifles hmun, Unit Hospital, Loch House, Quarter Guard leh hmun dang an chhuah san ang a, hetihlai Assam Rifles 23 sector Headquarter Khatla ami leh DIG chenna Raj Bhavan bul ami chu an chhuahsan dawn lo a ni.

Sawrkar hotute sawi danin Assam Rifles in ram an chhuahsan tur te hi Restriction of Use of Transferred Land Act 2022 tlawh chhanin Mizoram sawrkar ram a ni nghal dawn a ni.

Aizawl khawpui atanga Assam Rifles Zokhawsang-a sawn chungchang hi kum 1988-a Pu Laldenga kaihhruai MNF Sawrkar lai atanga intan a ni a, kum 2019 khan Union Home Ministry chuan Assam Rifles te chu Zokhawsang-a insawn turin thu alo pe tawh a, hei hi harsatna hrang hrang Assam Rifles lamin an sawi avangin tih khawtlai a ni a, hemi hnu hian hmalakna hrang hrang kalpui

niin kum 2023 khan Union Home Minister Amit Shah chuan Assam Rifles Zokhawsang Complex chu alo hawng tawh a ni.

<><><>

AR LAND

Chief minister Pu Lalduhoma chuan Aizawl khawpui laili a Assam Rifles ram luah chhuahsan a nih hnu-ah Assembly House mawi tak din chu sorkarin tha a tih thu a sawi.

Ningani zana minister pahnih Pu Vanlalhlana leh Pi Lalrinpuii te department enkawlte atana sum ruahman sawihona-ah he thu hi sawiin Pu Lalduhoma chuan Assam Rifles ram luah chhuahsan tur hi tangkai taka hman tum a ni a ti a. Hemi atan hian party tin leh tlawmngai pawlte telna committee din a ni dawn tih sawiin an chhuahsan tur ramah hian assembly building tur zahawm leh mawi tak dah a ni ve thei ang em tih chu rilru-a lo neih turin MLA-te a sawm a. Ram pum huap pawhin Mizoram hi Assembly Building nei chhe ber ni tawh a a rin thu a sawi a. Chuvangin hemi chungchang hi ngaihtuahna lo seng turin assembly member-te a chah a ni.

Cable car/ropeway chungchang sawiin chief minister chuan an enzui thu a sawi a. Tuna an rilru-ah chuan remtih tlan a nih chuan Assam Rifles quarter guard chung tlang hi a hmunpui berah hman ni ta se an ti ni-in a sawi a. Heta tang hian Pachhunga University College nena inpawhin MINECO lama kal leh Ebenezer damdawiin a kal bakah Chawnpui a All India Radio ram an dil pawh an phal tawh thu a sawi a. Chu ta chawlhmun pakhat atang chuan state university dah an tumna hmun leh Aizawl West College dahna hmun tur Ch. Chhunga High School hmunah awm leh ta se la. Chuta tang chuan Mizoram University-ah chhuk ta se tih an ngaihtuah niin a sawi a. Chu mi chin chu ropeway bul tanna atan chuan ni phawt se tih an ngaihtuah niin a sawi a ni.

<><><>

CM-SASCI

Chief minister Pu Lalduhoma chuan Delhi a sorkar laipui a dawrna-ah special assistance to states for capital investment (SASCI) hnuai-ah sum thahnem tak sanction tihfel a nih thu a sawi.

Nilaini a zan khat riaka Delhi a zu kalna-ah SASCI thenkhatna a thawh hnihna sum cheng vaibelchhe 93 leh nuai 50 pekchhuahna tur sanction a sawi chhuak tih nizan hmasa khan assembly house-ah a sawi a. SASCI then 5-na reformed 3-na atan cheng vaibelchhe 100 bakah SASCI then khatna hnathawh dan an thehluh ran avangin a hma a pek zat chiah cheng vaibelchhe 275-a sum sanction a rawn hawn bawk niin a sawi a ni.

Pu Lalduhoma chuan Ningani tuka Union Home Minister Amit Shah nena an inbiakna-ah Lengpui tumhmun chu Airports Authority of India (AAI) kuta hlan dan dap leh ni se tih an sawi dun ni-in a sawi bawk a. Amit Shah hian AAI nena inbiakna thar thawh leh tha a tih thu a sawi niin a sawi a. Hei hi tlawmngai pawlte leh political party dangte pawhin an duhdan a nih thu hrilhin chulam hawi chu tha a tih ve thu union home minister hi a hrilh tih a sawi a.

Hemi chungchangah hian amah leh Amit Shah leh Civil Aviation minister-te nen sawiho ni se ti-in thu an dah thu a sawi a. Union home minister hian theihtawp chhuahpui a inhuam ni a a hriat thu sawiin a chungah pawh lawmthu a sawi niin a sawi. A lo sawi tawh thin angin sorkar chuan Lengpui tumhmun hi Indian air force kuta hlan hi an tum ngawr ngawr lo niin a sawi a. AAI hnena hlan emaw duhthlan tur dang emaw dap turin an inhawng reng niin a sawi a ni.

Pu Lalduhoma hi Nilaini khan Delhi lamah a chhuk thut a. Delhi a cham chhung hian Nilaini khan union home secretary Govind Mohan, intelligence bureau director Tapan Kumar Deka leh national security adviser Ajit Kumar Doval te nen inhmu-in thil an sawiho thu a sawi a ni.

<><><>

SENIOR CLUB

Social Welfare & Tribal Affairs Minister Pi Lalrinpuii chuan kumin chhung hian District Pali - Champhai, Siaha, Lunglei leh Kolasib-ah te Sorkarin kum lama upa te enkawlna hmun 'Old Age Home' hawn a nih tur thu leh Aizawl Ainawn Veng ami pawh tihchangtlun an tum thu a sawi.

Pi Lalrinpuii hian nimina Senior Club Mizoram te'n High Council 2025 Zarkawt Community Hall-a buatsaih a hmanpuina-ah hei hi sawiin, sorkarin kum upa te tana hmala in, ruahmanna pawh lo nei mahse, kum upa-te mamawh ber chu rilru hlim leh thlahmuang taka an khawsak a, duat leh hmangaih taka enkawltu tur chhungkua an mamawh ber a ni a ti a. Upate pawimawhna leh zah an ngaihzia te chu tu leh fate zirtir a ngai a, hnam lungphum innghahna chu upate an ni a, thalai te chu hnam chakna an ni a, naupang zawk te chu hnam beisei innghahna an nih avangin kum upa te chu thlauthlak thiang an nih loh mai bak-ah thlahthlam theih an ni lo a ni, a ti.

<><><>

ASF

African Swine Fever (ASF) vawk pulhri leng avangin ni 80 chhung chu vawk thi leh suat a awm tawh rih lo.

Kum 2021 March ni 21 khan Lunglei district-a Bangladesh ramri hnaih, Lungsen khua-ah ASF vawk pulhri hi Mizoram a a vawi khatna atan vawkin a kai tih hmuhchhuah a ni a. Heta tang hian kumtinin ASF vawk pulhri hi a leng ta ziah a. Nikumah pawh khan vawk tam takin an thih phah bakah he vawk pulhri leng a darh zel venna atan vawk tam tak suat a ni a. Kumin 2025 chhung hian ASF vawk pulhri avangin vawk thi leh suat a la awm lo ni mai lovin nikum December ni 24 atang khan a awm tawh lova, vawiin hi he hrileng avanga vawk thi leh suat a awm loh ni 80-na a ni.

Nikum February ni 9 khan Champhai district a Leithum khua-ah ASF vawk pulhri vei hi hmuhchhuah leh a ni a. Vawk tam tak thi a suat a nih bawh hnu-ah December ni 24 atang khan vawk suat leh thi a la awm leh ta rih lo a ni.

<><><>

RIVERS

International Day of Action for Rivers vawi 28-na chu nimin khan Irrigation & Water Resources Department bultumin IWRD Auditorium,

MINECO-ah kan luite hi kan hmabak a ni tih thupui hmangin Mizoram-a tui hna humhalh a ngaihzia leh bawlhhlawh paih fimkhur loh avanga a nghawng chhiat zia te zau zawka inhrilhhriatna hun hman a ni.

He hun hi IWRD Minister Pu PC Vanlalruata chuan hmanpuiin Mizoram chhunga lui te, tui hna leh ram ngaw te leh leilung hausakna hrang hrang humhalhna kawngah he ni hian awmze thui tak a neih ngei a beisei thu a sawi a. A tel lova awm theih loh 'tui' renchem, vawn thianghlim, tui hna humhalh leh bawlhhlawh tih tlem kawngah mi tinin mawhphurna an neih thusawi-in, vawi khat hman plastic hman tlem leh bawlhhlawh, thil tangkai siamchhuah na'na sawngbawl kawngahte hmalakna kalpui a pawimawh thu a sawi. Minister chuan ram leilung hausakna humhalh tur hian nakin nghak lovin, tun atang hian mahni theihna zawn zel ah penchhuah a pawimawh a tul thu leh Mizote ram neihchhun luah tlaka tu leh fate tan siam zel theih na'n tuna Mizoram a luah mektute hian mawhphurna pawimawh tak an neih thu a sawi a ni.

<><><>

AIR NEWS ON SOCIAL MEDIA

Chanchinthar hi Akashvani Aizawl atanga puan a ni a. AIR News Aizawl Youtube Channel, All India Radio News Aizawl Facebook page leh newsonair.gov.in ah te chanchinthar hi ngaihthlak leh chhiar theih a dah a ni.

Vawiin chawhnu dar 2 leh a chanve-ah Chanchinthar puan leh a ni ang.

<><><>

ISRO

Indian Space Research Organisation (ISRO) chuan satellite an kahchhuah atangin dollar maktaduai 143 an thawkchhuak. Department of Space sawidanin ISRO hian kum 10 chhungin sumdawnna kaihhnawih ramdang satellite 393 leh ramchhung ami satellite 3 an kapchhuak tawh a. Heng zingah hian US, UK, Singapore leh ram changkang tak takte an tel a ni..

<><><>

IRAN NUCLEAR

China, Russia leh Iran te chuan US in Iran a hrekna titawp a, nuclear lama thawhdunna tharthawh leh turin an ngen. Ram pathum aiawhte hi Beijing ah inhmukhawmin US in Iran a hrekna chu tihtawp an duh thu an sawi a. He inhrekna hi dan kalh leh thuneihna hmansualna niin an puh a. Thuchhuah intawm an siamah ram pahnih indawrna tha leh inzahtawn tak chung a palai thawhdunna tha tak chu buaina chinfelna kawng awmchhun anih thu an sawi a ni.

<><><>